



kat.komp

53382

I

Mag. St. Dr.

P

24.

quiter spectantia.

*Sturcii (Avar.). Oratio de nobili-
tate eiusque natura et officiis.*

Cracoviae. 1604.



ORATIO
DE
NOBILITATE
EIVSQUE NATURA
ET OFFICIIS.

AD

ILLVSTRISS: HEROEM ET DOMINVM,
D. NICOLAVM ZE-
BRZIDOWSKI DE ZEBRZI-
DOWICE, PALATINVM ET GE-
neralem Cracouiensem, Sniatineñ. & c.
Capitaneum, Senatorem Regni Po-
loniæ Primarium,

Scripta ab

AZARIA STVRCIO

I. V. Cand,



CRACOVIAE,

An. Dom. 1604.

Santthi 1124. 6.

ILLVSTRISS: DOMINO.

NICOLAO ZEBRZIDOWSKI
DE ZEBRZIDOWICE, PALATINO ET

Generali Cracouiē Sniatineē : &c. Capita-
tanco, D. & Mæcenati suo reuerenter colendo S.P.

533827
EX QVO, ILLVSTRISIME HE-
ros, in nobilissimam Cels. V. clientelam susceptus
sum, ab eo statim tempore, quo iuris interpret filio
Cels. V. iuueni generoso & magnæ spei destina-
bar, vidi & cognoui humanitatē Cels. V. summam,
quam in tanta dignitate omnibus declarat: Mihi
quoq; peregrino & veluti exfuli tantam beneuolen-
tiam exhibuit, vt ingratum me planē iudicarem, si
non aliquo grati animi signo hoc ipsum cunctis o-
stenderem. Offero ergo hoc qualecunq; literariū
munus de Nobilitate eiusq; natura & officiis. Polo-
niam fidus nobilitatis dixerim, cui ad omnes hono-
res & dignitates per virtutem facilis est aditus. At
inter nobilitatem Polonam familia Zebrzidouiorū,
tanquam Hesperus, emicat: Cuius Cels. V. propter
heroicas virtutes meritò ornamentum dicitur. Sed
harum argumenta alteri tempori referuo, ne breui-
tate gloriā obscurem. Deuoui enim me meaq; stu-
dia Cels. V. Interim hoc exiguum gratitudinis si-
gnum Poloniam relinquens apud Cels. V. extare
volui. Valeat Cels. V. quàm diutissimè. Cracouiæ
pridie Non. Decemb. Anno 1604.

Cels. Vra

Addictissimus Scruitor.

Azarias Sturcius.

ORATIO.



AGNVM EQVIDEM DICEN-
di argumentum elegimus tractandum, quod
animis nostris inhiere debere putamus; turpe
esse viro nobili ac patricio ius, in quo versa-
tur, ignorare; sed utinam eadem vis nostræ
orationi inesse possit, quam habuit, cum pri-
mum à Q. Mutio ad Seruium Sulpitium pro-
nunciaretur. Tanta enim acrimonia percussit pectus Seruij Sul-
picij, vt ille non solum, quàm multa paucis dicta essent, facile
agnosceret: sed & adeo iuris ciuili Scienciæ operam dedit, vt
multis, qui iam longis interuallis præcesserant, palmam præri-
puerit. In probis enim vel maximè in promptu est, si de ho-
mine splendidis natalibus & generis dignitate præclaro, illud
Ammiani Marcell. de Orphito summæ dignitatis viro scriptum
occinatur: Vir prudens quidem & rerum forensium oppido
gnarus est, sed splendore liberalium doctrinarum minus, quàm
nobilem decet, institutus. Itaque constat quantò ignorantia re-
rum diuinarum atque humanarum nobili viro plus dedecoris &
obscuræ excitationis vim adferre solet, tantò è diuerso scien-
tia iuris vsu rerum confirmata, decus præclarius addat, & digni-
tatem adferat verè inclytam. Et certè nobilis vir è summo ge-
nere natus, nihil prius, nihil antiquius habere; quin potius in
eam rem, omnes ingenii ac industriæ neruos intendere debet, vt
à maiorum virtute & laude minimè degenerasse videatur. Quod
sic facillimè consequetur, si turpitudinem non solum vitæ & fa-
ctorum cautè deuitauerit, sed etiam, si, quam ignorantia iuris,
disciplinæ & bonarum disciplinarum aspergit maculam, pru-
denter euitauerit, vt dignitate non minus quam virtute, & suæ
non alienæ virtutis commendatione præcellere videatur. Ope-
ræpretium ergo facturi videmur, si breuiter & succincte pro-
posu-

posuerimus, quod sit verè nobilitatis eximium decus, quæ iusta & conueniens eius comparandæ & conseruandæ ratio. Deinde quod artes ingenuæ fideliter perceptæ, tantum abest, vt nobilitati derogent, vt ei amplissimum quoq; decus & immortalẽ quendam splendorem adferre soleant. Vos omnes & singulos rogo, vt benignum mihi præbeatis animum, ne sermo in vanum recidar, si æquis animis acceptus non fuerit.

Itaq; rectè præcipiunt, qui aiunt, suis quemq; bonis confidere debere, quod & tutius, & firmitus in propriis fixisq; bonis adsit præsidium, quam in alienis atq; caducis. Quamobrem & Diogenes eos solum nobiles & præclaros dixit, qui cuncta, quæ homines admirantur & in pretio habent, veluti diuitias, honores, omnesque vitæ suauitates, pro nihilo ducerent: ea verò quæ viderentur acerba, quæ multa & varia in hominum vitæ fortunæq; occurrunt, ita ferrent, vt nihil à statu naturæ, nihil à dignitate discessisse, sed omnem fortunæ casum inconcussæ mentis constantia superasse viderentur. Sanè virtutis exercendæ exactissimam ille rationem descripsit, & sic planè eam proposuit, vt eam consequi homini futurum sit difficilimum, nisi singularis animi moderatio adhibeatur, qui seipso contentus sit, & cætera parui faciat. Quàm virtutis, quæ nobiles facit & promouet, laus sit magna, ambiguū est nemini: quam eius via aspera & salebrosa sit, obscurum est nemini. Nec enim eius opera statim in promptu est, sed doctrina, vsu & adsuëfactione comparanda, exercenda, & factis præclaris velut exornanda. Sed tamen par est, vt pro humanæ naturæ imbecillitate sic eam rem moderemur, vt etiam mediocria in laude poni posse arbitremur. Infirmior quippe est nostri animi virtus, quàm vt exacto officio singula pericere possit: & in multis item rectè voluisse sat est, vt multum à suo perfecto statu, ob innatam peccati labem, mentem degenerasse intelligamus. Dicimus porro nobiles homines eos, qui dignitatẽ sui generis rectè factis tuentur, vel qui decus aliquod suæ familiæ virtute acquirunt

acquirunt. In vtriusque enim eandem virtutis vim & laudem respicimus: Sed illis, ob sanguinis splendidioris decus & natiuitatis felicitatem, maiorem attribuimus honorem, quod cum occasio ex opum insolentia offeretur, intra virtutis tamen & modestiæ fines se continere voluerint: His verò velut nouis hominibus sola sua virtus adiumento est, alio exteriori ornamento destituti. Cæterum cum natiuas nobilitatis distinctiones esse aduertamus, multis omisis, duo potissimum genera pertractabimus. Primum ergo genus nobilium esto eorum, qui existimatione hominum nobiles esse dicentur. Alterum verò eorum, qui & virtutis veritate, & generis claritate nobiles existunt. Primi generis duplex pertractatio, tum in stēmatibus antiqui veneratione, tum in virtutis honore constituetur. Primò ergò occurrunt illi, qui origine quidem præclari: factis autem desides, & maiorum dignitate planè indigni esse reperiuntur. Sed quid vnquam laudis inertia promeruit? Sanè familiæ decus improbitati & socordiæ nullum patrocinium præstat, nec vlla dignitatis patriæ laus & vtilitas, diuersa sequentibus relinquitur: quin imò maiorum virtus degeneres liberos indignos suo honore conclamat, & acri iudicio, quanquam in summo fastigio collocatos, coarguit, quod legitimam familiæ honorem fœdè deposuerint; vè quidem eleganter Theopompus dixisse videatur: Generosi non sunt, inquit, existimandi qui ex probis & bonis parentibus nati sunt, sed qui honesta & bona sibi sequenda proponunt. Quemadmodum enim equus non idcirco celer dici potest, quod ex celerrimis procreatus est equis, sed quod in quocunq; animali sua quædam virtus & generositas considerari debeat. Sic mehercle non rectè bonum vel fortem virum, ex bono quod est natus parente, appellaueris. Siquidem nulla homini solida laus, nisi ex rectè factis proficiscitur. Quapropter si nobilitatem vel antiquam maiorum gloriam, vel coaceruatas diuitias esse existimaueris, haud æquus cognoscendæ veritatis iudex videri poteris: siquidem rei

alienæ & incertæ iniusta & incerta possessio est: tum quoq; nemo sapiens se fortunæ, inconstantissimæ Deæ, quæ in suis bonis miseros sæpe ludos agit, arbitrio committat: quin potius bonum, quod natura proprium concessit, teneat, eiusq; lance & decreto, quicquid extrinsecus accesserit, æstimet, ac in maius providenter augeat, ut in se, velut in archetypo, iusticiæ atq; veritatis effigiem exhibeat & ostendat. Quare antiqua maiorum gloria tum demum ad nos pertinet, cum eam in vita nostra rectè instituenda & gubernanda imitari & retinere contendimus. Itaque virtutis à iusto animi habitu profectæ facultas ad posteros transmittitur, si simul & illi, ut sanguinis cognatione, sic virtutis vnione copulentur & connectantur. His δυνούσ χαρακτήρ & πᾶσαι αἰσῆς ἐν βροτοῖς ἐδιδῶν γένεσθαι: hi maiorum exemplo & moribus proficiunt: hi meritò cæteris præferuntur. videtur & hinc optimæ consuetudinis ratio profectæ esse, quod honesto oriundi loco, primis dignitatū muneribus funguntur, namque ipsa generis nobilitas spem facit, his rectissimè curam Reip. committi posse, qui, cum ipsi honestati student, tum generis sui auctoritate à suspitione etiā turpitudinis deterrentur. Contra verò qui sui ipsius suæq; dignitatis obliti vitiis se contaminant, & maiorum gloria pro suo fucō utuntur, non immeritò reprehenduntur. Quid enim cæco speculum, quid hisce indignis familiæ amplitudo prodest? Deinde in diuitiis nobilitatem sitam non esse, manifestum fiet. Opes sæpè non bonitatis, sed malitiæ potius, in deprauatis præsertim ingeniis, pabulum sunt & occasionem præbent; ut contra, si moderatio animi accesserit, magnum virtutis consequendæ emolumentum adferunt. Quapropter ista nobilitatis adipiscendæ & conseruandæ ratio consideranda est, quæ tum in virtute & morum bonitate consistit: tum multo certior & præclarior est, quam illud extraneum & incertum fortunæ bonum. Non igitur Socræsis, ex patre statuario & matre obstetricæ nati, ignobilitas, Sarda-

Sardanapali gloria nobilior fuit? Sanè. hic enim turpiter vita
acta regnum amisit: ille, virtutis honore æternum glorię monu-
mentum apud posteros reliquit. Pręterea hæc sola & vera est
boni natura, ne ulli rei externę se mancipet, neque in his, quę
corporis sunt, sed in ea animi parte, quę est princeps & præci-
pua, inesse velit. Etenim cum Deus nos pro paterna sua cle-
mentia bonitatis suę participes fieri voluit, templa eius vt esse-
mus, constituit, præstantissimamq; nostri partem, mentem puta,
occupauit & suę diuinitatis radiis illustrauit. Summæ ergo rei
summa est tribuenda dignitas, ab eaq; summum honoris peten-
dum incrementum, nam mens est origo virtutis, cuius deinde
ministerio, tanquam reginę, honores, principatus, aurum, ar-
gentum deseruiunt. Quapropter sanctitatis impollutę mentis so-
lus verę dignitatis splendor, certūq; est ingenuitatis fundamentū;
soliq; nobiles dicendi sunt, qui virtuti velut mancipati adhæ-
rent, quosue à vero virtutis tramite nulla vel periculi, vel alte-
rius mali necessitas dimouere præualeat. Nec absurda est So-
strati tibicinis sententia, qui generis obscuritatem sibi obiiicienti
in hunc modum respondit: Maior mihi excellentię laus debe-
tur, quòd vitę meę honestate meę familię initium fecerim,
quam tibi, qui vitę turpitudine summam dignitatem prostitu-
isti. Quemadmodum enim frumentum non ideo melius existi-
mamus, quod in pulcherrimo agro est natum, sed quia benè
nutrit: sic non ex generis claritate, sed ex morum probitate vi-
rum optimum iudicamus. Immeritò igitur improbi, nobilita-
tis decus, quod suę socordię inaccessum relinquitur, sibi ven-
dicant, siquidem patria vrbeque extorris est, quisquis virtutis,
quę sola firmas sedes locat, semitam ingredi & tueri neglexe-
rit. Proinde nec antiquitas generis tam magnificum est, vt nu-
dos operiat: tam præclarum, vt indignos euehat: tam denique
permanens, vt non in vitiis posterorum euanescat. Nec etiam
tempus vitiorum fucum; imò veritatis lucem adfert, vt Pindar.
eleganter cecinit. Quod igitur familię vetustas pro dignitatis
magni-

magnificētia ſuiqꝫ conſervatione requirit : id ſi quis non modo inſolenter negauerit, ſed inſuper acceptam dignitatem vitiiſ contaminauerit, dubium non eſt, quin talis indignum ſe maiorum imaginibus efficiat. Quocirca nec Lyſander ſolidiorem veræ gloriæ commendationē apud poſteros ideò reliquit, quod ab Hercule genus duxit, cum pleraqꝫ generiſ auctore, fraude & vaſtricie ſua, indigna faceret. Quamobrem ſi verè exiſtimare volumus, genus alitè ab antiquiſſimis temporibus accerſere & ea in re ſola gloriari, nihil aliud eſt, quam laus ſanguiniſ putridi, Probrum enim eſt, vt Nazianzen, rectè dixit, malum vocari, non ignobilem, genus eſt eorum qui diu ſunt putridi. Nunc porro inueſtiganda eſt ratio, quare heroum filii plerumqꝫ ſunt noxæ, & ſecula noſtra progeniem producant vitioſam, mox datura deteriorem. Neminem quidem fugit ratio, ſed pleriqꝫ ſaniſ oculiſ cęcutire malunt. Verum quod in agris, idem in familiiſ euenire videmus. Si benè excolitur ager, lætiſſimè proueniunt ſegetes : ingeniſ excultiſ & exercitatiſ, pro tempore, homineſ excellentes & magnifici exiſtunt, vbi autem agri cultura ceſſat, & parentum virtus in liberis paulatim deficit : familiæ in tantum ſterileſ redduntur, vt excellenſ iſta animi generoſitaſ in ruſticitatem degeneret : ſumma ingeniſ ſolertia in barbariem & fatuitatem conuertatur. Doctrina enim, vt verbis Horatiiſ vtar, vim promouet inſitam, rectiqꝫ cultuſ peçtora roborant, vtcunqꝫ defecere mores, dedecorant benè nata culpæ. Accedit quod vetuſtaſ omnia conſumit, longa vaſtietas omnia miſcer, inſtabiliſ fortuna omnia ſuſſum ac deorſum verſat, vt non modò ciuitateſ, ſed & ipſa mundi virtuſ, diuturno uſu, deficiat debiliteturqꝫ. Quot & quàm inſigneſ ante pauca ſecula fuerunt familię, quorum nec nomen ſupereſt, aut in viliffimū redactæ ſunt ſtatim : ſcilicet ne quiſ exiſtimet tecti non firmati, & familiæ virtutiſ decore non exornatæ, diuturnam longamqꝫ fore poſſeſſionem. Hoc ampliuſ grauiffimè à Platone dictum eſt : ſi primam cuiuſqꝫ familiæ

familiæ originem inquisieris, inficiās non ibis, quod nec Rex,
qui originem à seruo non duxerit, nec seruus fuerit, qui à rege
oriundus non venerit. egregia igitur est Horatiū vox dicentis,
permutat ima summis, insignem attenuat Deus obscura pro-
uens. Nec opus est de hoc exempla referre, cum cuiq; ea sint
obuia, & nobis velut oculis exposita tam antiqua, quàm recen-
tia, quod nempe præter cæteras res omnes familiæ procedant
instar rotæ in gyrum velocissimi cursus agitata. Quod tum sua
calamitate testatum faciens, rex quidam à Sesostrī AEGyptio-
rum rege captus dixit, cum alligatus tribus alijs regibus cur-
rum traheret: talis est nostræ conditionis ratio, qualis rotæ
currus, vbi modò summum imo, modò imum summo succedit
conuertiturq;. Nulla fors longa est, ait Seneca, nedum familiæ,
relictæ virtute, antiquatæ gloria. sensim namq; fortuna à se lar-
gita bona miscet & aufert. Ergò non est vis in genere, cum de
inferioribus fiant reges ascendendo, ex regibus comites de-
scendendo. Quamobrem qui caducis rebus se credere au-
det, & ob alienas laudes tumidos spiritus assumit, quin in-
maximo is versetur errore, atq; in præcipitio fortunæ con-
sistat, non est dubium. Si enim eminentes fortunæ sæpè
contrarios sortiuntur euentus, quousque hic fallaci temeri-
tate progredietur, qui suæ conditionis statum non virtuti,
sed euanido fortunæ bono concedidit? Proinde cum omnis
status noster sub perpetuo motu consistat, profectò ijs bonis in-
nitendum est, quæ sua sede nulla fortunæ tempestate dimoueri
possunt. Sed tamen fatendum est, quod maxima dissimilitudo
sit tum ingenij, tum virtutis etiam inter optimè natos, vt non
immeritò dicere liceat, magnam in vtramq; partem educationi
vim inesse. Hoc in canibus ex vna matre natis videre licet, quod
alter alterum sæpè generositate & solerti indagine vincat: idem
quoque in sobole eiusdem feminis euenire posse, exemplo sint
filij Abraham S. Patriarchæ: hic prole fecundus multos susce-
pit è tribus mulieribus liberos; at è multis vnus solus nuncupa-

B

rus est

tus est heres patrimonij: alij omnes, cum à pietate descuissent,
& nullum parentis sui factum exprelsissent, oblegati sunt à fa-
milia & à nobilitate illustri alienati. Indignis igitur, qui virtu-
tis & artium egent, nihil confert naturæ donis & generis com-
modis omnibus abundare. Quamobrem semper recta, iusta &
honeste agere consilium est: sic enim, si sumus nobiles, osten-
demus nos non indignos magnificentia nostræ familiæ: si igno-
biles sumus, familiam obscuram splendore & radijs dignitatum
illustrabimus. Succedit ergò nunc dicendum, quæ tantæ vari-
etatis ratio existat. Sanè non licet parentibus sic virtutis, pie-
tatis, fortitudinis & iustitiæ thesauros relinquere, vt opum &
diuitiarum acervos ipsis recondunt: Tum quoq; hanc sibi De-
us prærogatiuam in rebus humanis gubernandi formam refer-
uauit, vt arcano & inscrutabili suo consilio cuncta fiant & mo-
derentur. Ille enim dat, cui vult, ille honores transmutat & lo-
cat, ille gratiam & sui amorē humilibus impertit, ne quis mor-
talis vltra fas altè sapere, & suis, etiam quæ non habet, largiri
præsumat: quin potius se diuinæ voluntati subiiciat, & suorum
fortunam iusta educatione & vitæ honestate moderandam esse
sciat. mens enim primæ ætatis rudimenta & in reliqua vita re-
seruat. Quare ab vnguiculis Deum diligere, humana despice-
re, virtutem colere, vitia fugere, leges vereri, offendi prauis, læ-
tari bonis, iuuenum decus est: Quæ si initio placuerint, mox
honestatis laus fructus vberiores reddet; vt si certa fuerit ani-
mi benè compositi facultas, certior quoq; externis rebus com-
parata sit possessio. Iam vero, si parentum dignitati confidis, ab
alieno eoq; fugacissimo bono pendendum erit; quo sublato nu-
da cornix mouebit risum: si diuitijs onustus gaudes, alienæ te
culpæ reum facies. Vix enim opes citra fraudis participatio-
nem & proximi læsionem acquiruntur, vt Pythagoras censuit.
Timidius verò sine legitimo vsu possidentur. quid etiam vulgaris
sermone prouerbiū enunciet, cuiq; cogitandum relinquo: O-
pes malè partæ malè dilabuntur. Nec quicquam dixerim de
D. Hiero-

D. Hieronymi sententia ad Phidiam ita scribentis: Omnis di-
 ues aut est iniquus, aut heres iniqui. Si ergo ex opulentia nobi-
 litatem existimaueris, mirum ni familiae bonum feceris initium,
 vel potius scedum induxeris exitium. Quare magis est, vt existi-
 mem, virtutis potius, quam opulentiae opum sibi exhiberi testi-
 monium esse optandum: illud enim bonae mentis, hoc autem
 fortunae affluentis encomium esse videtur. Quapropter, vt re-
 uertatur vnde deflexit oratio, nobiles, in quibus nullus labor
 nullaq; industria virtutis est, ac solum maiorum merita & ima-
 gines commemorant, & hac rerum externarum umbra se ma-
 gnos putant, vani & fatui sunt. Nam quid imaginibus: quae
 non ignauis, sed solertis ingenij ac virtutis hominibus attribu-
 untur & deferuntur: *Quid auitis fulta triumphis, atria?* Quod
 enim maiores labore ac bellico sudore pararunt, id nos socor-
 des tenere, nefas existimandum est. *Quid pleni numerofo consu-
 te fasti proficerent:* Quanto maior laus est ijs, quorum industria
 & virtus hoc meretur, vt eorum sollicitudini tota Reip: cura
 incumbat: tanto turpius dedecus eorum, qui se omnium vitio-
 rum exemplar alijs exponunt. *Si vita labat, perit omnis in illo
 Gentis honos;* qui ex virtutis decore captus non nisi aequali
 eiusdem lance ac perfectione confirmatur: *cui laus est in origine
 sola:* eleganter haec Ouidius cecinit: sed nobis idem ex diui-
 nis literis demonstrabitur. Quis ex Adamo nostrum omnium
 primo patre natos, patricios & quidem patriciorum principes
 esse negat? Si quidem pro prima maris ac faeminae coniuncti-
 one praclarissimum & augustissimu genus sortiti sunt. Parem
 tamen vterq; non retulit pietatis amorem. Maior namq; natu
 filius Cain minorem iustum Abel immaniter, horrendum! &
 medio sustulit, nec terram sanguine fraterno polluere dubita-
 uit. Quid ergo huic profuit generis nobilitas animi ignobilita-
 tem pra se ferenti. Quid boni contulit Cham filio Noah tan-
 to patre fuisse genitum, qui propter mentis improbitatem ab
 illustri nobilitate delapsus execrabilis factus est, & posteris

initium fidemque infelicitatis relinquit. Quamobrem hi fines ac
termini hominibus adeptæ dignitatis præfigantur, ne, qui vir-
tute expertes sunt, de splendido genere intumescant. Multo au-
tem rectius hic fecerit, qui hoc agit, hoc curat, in hoc desudat,
ut cordatè dictum factumq; M. Tullij Cic. usurpet: Satiusest
me meis rebus gestis flo-^{re}re, quàm maiorū opinione niti, & ita niti,
ut ego sim posteris meis nobilitatis initium & virtutis exem-
plar: contemnunt nouitatem meam; ego illorum ignauiam:
mihi fortuna, illis probra obiectantur: melius est peperisse
nouam, quam acceptam dignitatem corrupisse. Quò ergò
dementiæ dilabuntur illi, qui se ob maiorum laudes absq; suo
merito magnificari volunt, quis non videret? Sed aduerte, maio-
rum gloria posteris quasi lumen est, neq; bona illorum neq; in-
occulto mala patitur esse, ut non satis, nec cuique suæ inertiae
præstat encomiū, quamuis infelices filij laudent parentes suos,
ut est in prouerbio. Quicumq; ergo præclarum sortitus est ge-
nus; ad Deum omnium rerum gubernatorem preces fundat, sem-
perq; vota faciat, ut sibi, diuino eomitante fauore, honestatis se-
mitam & maiorū sancta exempla sequi & imitari liceat. quippe
plena turpitudinis arrogantia est, de parentum laude se indigno
gloriarī: nam fortis natura iustus & à seruo oriundus nobilior,
teste Euripide, quàm qui inani gloria tumet, censendus est. Adhuc
demonstratum est, quod nemo verè nobilitatem sibi ratione o-
riginis arrogare possit, cum æstimatione communis omnium
ortus nihil homines inter se peculiare habeant. Vna enim ea-
demq; tellus omnes nobiles & ignobiles produxit, & vnus pater
Deus omnibus eandem largitus est faciem: Quod autē distincti
inter homines sunt dignitatum gradus, id non origini cuiusdam,
sed virtutum meritis imputandum est. Itaq; virtutis opinione
& temporis diuturnitate factæ sunt arbitrariæ leges, quibus no-
bilitas in alijs commendetur, in alijs verò contemnatur. Siqui-
dem pro sententia Eurip. ὁ δὲ εὖνος ἐκ πίᾶς χρεὼς δὲ καὶ ἴσα ἐπαύρων
καὶ νόμος δὲ κινύσιν ἀνθρώπων καὶ κοίτη τάς. h. e. Tempus ex se natum
iustam

iuſtam adducit regulam, qua vt oſtendit hominum prauitates,
ſic meritas laudes celebrat.

Secunda ergo ſpecies primi generis ſuccedit, quæ eſt eorū,
qui propter virtutem nobiles eſſe exiſtimantur: & hæc quidem
ratio ad conſequendam nobilitatem & rectior & honeſtior eſſe
videtur, nam quis neget pluris æſtimandā eſſe rem labore com-
paratam, quā quæ vel natura, vel caſu cōtingerit? & nonne
maior eſt excellentia eorum, quæ animo poſſidemus bona, quā
quæ corpore? Certè vtriuſq; comparatione inane iactantiæ ar-
gumentum eſſe videtur de natiuitatis iure, non ſecus ac de Sal-
maticis ſpolijs ſine ſanguine & ſudore partis, turpiter inſoleſce-
re. Atquin virtutis pro æquitatē ac patriæ ſalute propugnantis
laus perpetua eſt. hæc aduerſa fortiter perpeti docet, hæc in ſum-
ma periculi difficultate conſtantes ſeruat, hæc viros magnos &
æterna laude celebrandos facit. Hanc ſi neglexeris, non eſt quod
aliud felicitatis fundamentum petas: Quid? nobiles eſſe cen-
ſes, qui auitas paternasq; flagitijs obruerunt imagines: at igno-
biles, qui poſteris fecere genus? Proh Deum atq; hominū fidē
in illis non ſeruāſſe, quod acceperunt, maximum ſit decus:
in his, quod nemo dederat, feciſſe non ſit laudabile? Quam-
obrem quod ſumma hominū differentia eſt, virtutis vnica viſ
& potestas conſtituit, quæ cuiq; ſtatus & conditionis ſuæ iuſtā
oſtendit rationem. Si enim homines naſcendi fortem ſibi face-
re poſſent, nemo eſſet humilis, nemo egenus; vnusquiſque fe-
licem domum inuaderet: ſed quam diu id non licet, naturæ
munere nobis vtendum eſt, vt in quemcunq; locum illa nos mi-
ſerit, in eo acquieſcamus. Si igitur nominis amplitudinem
conſequi optamus, virtute noſtroq; labore id effici debet. Itaq;
ſummo digni honore reputabimur, cum ſumus noſtri. Quis
fuit Dauid, conſcendit eum limina regni? cuſtos pauperis gre-
gis. Quis fuit Marius, ſi illum in ſuis inſpexerimus maioribus?
humilis, Quis Agathocles? filius cuiuſdam ſiguli.

Quæ

Quæ ergò tentanda via, quæ te quoq; possis

Tollere humo, victorq; virum volitare per ora?

Est vix via, alta, ardua, per speluncas saxi structas asperis, pendentibus, maximis, vbi summo vertice amcenitas certissima. Hanc non generis amplitudo, nec diuitiarum acervus sternet & aperit, verum illam virtute & præstanti mentis robore vincere & exsuperare licet. quare hoc intuendū est, quod sanctum & augustum nobilitatis nomen, non atrium famosis plenum imaginibus, sed animus virtute & bonis literis instructus nanciscatur & contineat. Quo tum pertinet, quod Phalaris tyrannus Agrigentinus Axiocho respondit: Ego nobilitatem virtutem noui, cætera fortunam: nam humili genere natus, vt bonus, ita regum & omnium hominum nobilissimus fieri: contra aliquis parentibus bonis ortus malus euadere potest, ac cū seipso, tum vilissimis quibusq; ignobilior: Tum his cordatè addebat: Igitur de laudibus animi glories, non de maiorum nobilitate in obscuriori posteritate iam extincta. Quocirca liquidò constat, quod magnum & nobilem virum non maiorum nobilitas, sed animi virtus efficere soleat. Sed quod res ista sic argumentis satis probata, nihilominus ad vulgi opinionem, quæ generoso & stemmate natos, magis quam novos virtutis laude suspiciendos homines & honorandos putat, accommodanda sit, id ex communi errore profectò veritati vim adfert. Insuper hæc virtutis vis & natura esse intelligitur, vt quibus decus & honorem attulerit, iisdem quoq; inuidiam ceu vmbra comitem assignet. Itaque non mirum, vt quibus *μὴ μέδαι* non licet, hi maximè *μωμῶνται* cupiant: imitati exemplum vulpis, quæ, vt est in fabulis, cum in alta arbore pira pro fame sedanda appeteret, sæpèq; arborem cauda percuteret, nec tamen optatis potiri posset, tandem irata contumelias in pira, quod essent acerba, dicere cepit. Planè non alienum ab ijs factum videtur, qui cum sua desidia istos dignitatum gradus consequi non possunt, contemnūt & disterijs proscindunt omnes, qui virtute partam sibi dignitatem pos-

rem possident: unde apparet, quod qui tam sinistrè sentiunt,
sint vt plurimum virtutis decore priuati. Sed aliud de hac re
vir præstans & virtutis laude abundans sumit iudicium. Sua
enim merita auitæ dignitati collata procul dubio pluris faciet,
quàm vt soli generis claritati inhærendum putet, ne sola nomi-
nis hereditas sine factorum imitatione ad se peruenisse videatur.
Itaq; aliter sententiũ opinio explodenda est, ne veritatis æqui-
tatisq; leges incerto iudicio subuertantur. Quod præclarus sit
thesaurus, teste etiã Platone, maiorũ dignitas, nemini est dubiũ:
Sed multo præstantius est huic opponere posse Stenelei dictum:

Atqui nos patribus longè præstamus auisq;.

Hæc igitur generis laus est tutissima, virum collaudare, quod
iustus sit & moribus optimus, & eundẽ vocare nobilẽ. Namq; si
lege iusticiæ quodlibet suis partibus æstimaueris, honor nobi-
litate, quæ si est mentis viuida virtus, animo; si corporis, eius-
dem generositati attribuetur: haudquaquam familijs, vt pote
rei extrinsecæ, ascribi poterit. Quare qui proprijs bonis ca-
rent, ad maiorum imagines confugiunt, nec animaduertunt,
quod ista generis nobilitas, qua glorientur, similis sit publi-
co singularum ciuitatum numismati, quod apud eos quidem
valet, qui instituerunt, apud alios verò adulterinum habetur,
vt Galeni verbis utar, qui subdit: Sanè æquum videtur, qui
nulla alia de causâ suspiciendi sunt, nisi ob diuitias, simulatq;
his spoliati fuerint, pariter & illis spoliari, quæ ob diuitias ha-
bebant. Quid enim isti facerent, qui nullum proprium possi-
dent bonum, sed perpetuò pendent ab alienis & ab his quæ sunt
fortunæ: tales sunt & hi qui nobilitatem venditant, atq; hinc si-
bi placentes tollunt cristas: hæc ille. O dementia, non sal-
tem hoc illi intelligunt, quod quò præclarius sortiti sunt genus,
hoc maiorem vituperij notam incurrant, 'maximumq; infeli-
citatæ nexum trahant: vt contra obscuro loco nati hoc lucrî
faciunt, vt pleriq; nesciant, quales sint: tum & hi summopere
commendantur, qui nullo maiorum exemplo virtutem fuerunt
secuti:

secuti: illi verò meritò contemnuntur, qui non & lege nature, & suorum exemplo virtutis cultū susceperint. Quare amplectenda est sententia Eurip. in Dyceto: de nobilitate parum laudis prædicare possum. bonus enim vir, mihi nobilis videtur: qui verò non iustus est, licet à patre meliore quam Iupiter genus ducat, ignobilis est. Cum igitur hic locus nihil habeat dubitationis, quin vera gloria à virtute proficiatur, non absurdum esse duco, eiusdem rei testimonia ab externis corporis partibus petere, quæ Philo in suo, quem scripsit de nobilitate, libro eleganter inducit. Quid, quæso, oculis capto ad vsum profuerit perspicax maiorum acies, cum ea priuatus sit, vel quid ad interpretandi facultatem impediat linguæ hominem iuuerit, parentes & auos fuisse vocales? Quid ad laterum firmitatem contulerit homini, qui longo & rabido morbo debilitatus est, si generis principes propter athleticum robur ascribantur inter eos, qui in Olympicis aut periodicis h. e. omnibus illis quatuor certaminum generibus victores extiterunt? siquidem manent nihilo secius eodem modo corporis vitia, nec reddi meliora possunt ex propinqua felicitate. Pari ratione nec iniustus iusti parentes, nec luxu perditis temperantes, nec omninò boni malis quicquã utilitatis afferunt. Itaq; arbitror nobilitatem, si Deus eam ad hominis formam effinxisset, stantem contra effrenatos posteros hæc dicturam: Non sanguine tantum, veritate iudice, sed actionum earundem similitudine & consecratione æstimatur generis coniunctio: Vos autem studia coluistis diuersa, inimica, quæ mihi sunt amica, & amica, quæ mihi inuisa putauistis. Apud me verecundia & veritas, moderatio, modestia & innocentia in honore sunt; apud vos autem sine honore iacent. Mihi inimica sunt impudentia, mendacium, immoderatio perturbationum, fastus vitiositas: vobis intima & cognatissima. Cur factis vosmet alienatis & verbotenus cognationis nomen induitis & simulatis. Insinuationes enim compras & fucos non fero, propterea quod facile est sermones in speciem bonos inuenire: at mores ma-

res malos commutare bonis haud facile est : In quæ cum intueor, & iam inimicos censeo, & deinceps existimabo, qui odij facies incenderunt. Hisce Philo eleganter sanè nobilitatis naturam in virtutis studio positam descripsit, atq; certo ceu indicio exactam rationem habendi iudicij de hominum dignitate tradidit; nihil tamen interim familijs honestis detractum iri volo, nam præter cæteras vtilitates, quas generis claritas secum adfert, hanc vel præcipuam habet, quod homines ingenui quasi lege astringant, ut ad virtutis amorē, ne scilicet propositis exemplis domesticis ab auita virtute degenerent. Vnde & Q. Max. Scipionem & alios dixisse accepimus, se intuendo maiorum suorum imagines plurimum accendi ad virtutis studium. Insuper rarò euenit, ut mali quid ille designet, qui considerat hoc se facto & maiorum dignitati labem, & periculum esse sibi met ipsi allaturum. His ita expositis restat ut de secundo nobilitatis genere differamus, qui tum tenetur, quando generis claritas summa cum virtutis laude coniungitur atq; retinetur. Nobiles igitur veri sunt, qui acceptam à patribus nominis hereditatem suis porro studijs, quibusdam dotibus & augmētis cumulant, ut non solum in nobilitatis ipsorū societatem veniant, sed in factorum quoque imitationem transeant : non æquantes modo, sed aliquando etiam adaugentes : exemplo Augusti Cæsaris, qui ait, se Romam ex luto ædificatam reperisse, sed ex marmore extructam reliquisse. Hi enim non solum propter maiores suos, sed propter semetipsos potissimum, ut apud Isocratem Nicocles refert, maiorem etiam honoris amplitudinē merentur. Atque hæc generis nobilitas, teste Socrate, iusta æquabilisque est animæ & corporis temperatio : huius laude celebrati sunt apud veteres magni heroes & homines Dijs similes, qui virtutem vnicum sibi præsidium, & rerum diuinarum atq; humanarum scire rationem thesaurum omnium præclarissimum esse existimarunt. Quippe & generis amplitudine & virtutis industria in summo dignitatum gradu constituti manifestum

C

stum suæ excellentiæ argumentum moribus & factis proba-
bant: nec par est vt obuoluta dignitatum ac virtutum claritas
in obscuro lateat, cum nec id nomen nobilium q. noscibilium
appellatum fieri pariat. Quemadmodum enim aromata sua-
uissimo fragrantia odore, quantumuis in vase recondita, ubiq;
odorandi sensum explent, eumque non modò ad proximè ad-
stantes, sed ad vltiores etiam transmittunt: Ita profectò ho-
nestus & ingenuus animus sui muneris & sinceritatis vota ad
plures transfert & communicat, vt ratio excellentiæ suæ & ex-
plorata omnibus, & utilis appareat. Egregia igitur est vox
Constantini magni Imp. Quantò, inquit, excellentiorem locū
inter homines tenemus: tantò hominum plus paremus aspecti-
bus, omniumque mortalium oculi, omnium iudicia, omnium
vota nostrum velle & nostrum nolle considerant. Certum est
igitur hanc acquirendæ laudis tutissimam atq; solidam esse ra-
tionem, vt fortunæ & generis beneficio sublimati, nostris por-
rò moribus, studijs ac virtuti amplissimum magnificentiæ de-
cus assequamur. Nec enim hoc vir nobilis pati debet, vt, dum
obscurò loco natòs virtute euehi posse videat, non ipse quoque
suæ dignitatis stabilem atq; perpetuam virtute & magnificentia
tenorem conseruet ac tueatur. Quemadmodum vero Reip.
tuendæ & conseruandæ ratio duabus potissimum rebus conti-
netur, armis nimirum & legibus: ita profectò illi, cui guber-
nacula rerum, siue id in publicis fiat rebus, siue in priuatis: nul-
la enim vitæ pars officio caret: demandantur, necesse erit, vt
cui se parti natura ingenijq; viribus maximè idoneum esse co-
gnouerit, eam vigili studio magnaq; opera suscipiat atque ex-
erceat. Quippe omnia simul benè præstitisse non homini datum
est. quocirca vnā solidè didicisse artem iuuat. Coniuncta enim
multorum studia certissimum florentis Reip. fundamentum
locant. Itaq; minuenda est opinio quorundam existimantium
bellicis solum rebus istud decustribuendum, quod magnos &
nobiles faciat viros: quasi vero interior mentis affectio & in-
dustria, qua externa hominum opera moderantur, non sit &
utilior.

utilior & præclarior. Sed qui ita iudicant, vim veræ nobilitatis non percipiunt, tantum abest ut eam sua natura vel parte asstiment, quod nimirum nobilitas mens sit, Deitatis imago, quare si illa impedita fuerit, quid manus efficient? Atque si doctrinis imbutus honestis alios antecellit, ut homo brutis animalibus rationis munere, quid de illis, qui cum ipsi nihil pensi faciunt; tum alios ludibrio habent, iudicandum sit, quilibet sapiens viderit? Profecto monstruosa hæc res est gradus summus & animus infimus, sedes prima & vita ima, lingua magniloqua & manus ociosa, sermo multus & fructus nullus, ut verbis D. Bernardi utar. Nos autem ex sententia exemploque inuictissimi populi Romani tenemus, non minus literis quam armorum virtute nobilitatem comparari posse. Maior enim apud illos prudentiæ ac fortitudinis togatæ ratio habebatur, qua Reipub. salutem dabant & conseruabant, quam militaris scientiæ, quæ solum belli tempore, non tamen sine consilij prudentis moderatione, laudabilis & necessaria est. Quo pertinet elegans dictum Choricij: sine bono consilio nihil efficit robur: prudentia verò, quamuis robur non assumpserit, multa multoties excogitat. Sanè Q. Maximus maiori gloria dignus est, qui cunctando restituit rem: quam Q. Terentius Varro, qui temeritate consilij apud Cannas exercitum perdidit. Et, me hercle, inauspicata nobilitas Catilinaria Reipub. Romanam contudisset, si non prudentissimus consul Cicero eam in libertatem asseruisset. Vnde Iuuen. *Roma patrem patriæ Ciceronem libera dixit.* Sapientia viribus præstat, & vir prudens melior quam fortis. Itaque domesticæ fortitudines, teste Cicerone, non sunt inferiores militaribus, in quibus plus etiam quam in his operæ studiique ponendum est. Omnino enim illa nobilitas, quam ex animi viribus proficisci diximus, mentis efficitur non corporis viribus. Quemadmodum enim maior est animi vis quam corporis: sic hæc res, quas persequimur, ingenio laudabiliores sunt, quam illæ, quas viribus, prout Vlysses quoque 13. Metamorph. inquit apud Ouid, *Tu tantum corpore prædis.* Nos

*Nos animo: & paulo post. Non in corpore nostro
Pectora sunt potiora manu; vigor omnis in illo est.*

Ut enim Imperator iusta belli gerendi consilia capiat, milites in officio contineat, deuictis gentibus iuste imperet, quis literarum cognitionem ei necessariam esse negabit? Parua enim, ait M. Tullius, sunt arma foris, nisi domi sit consilium. Quinimò quantò maiori gloria dignior est, qui rem partam inconcussam conseruat, illo qui de nouo acquirit: tantò doctus homo & præstantior & magnificentior est. quippe cui perpetua cura sollicitudo & anxietas incumbit, hostesque infensissimi, inuidia & odium, exsuperandi, ut adeptam patriæ salutem pro dignissimo militis præmio, tutò diuq; retineat & conseruet: tum quoque huius prudentia certa est salutis lætitia; illius verò sollicitudo incertus belli euentus. Rectè igitur à Seneca dictū: studia sunt, è quibus claritudo venit. Quod tamen Licinius Imper' impius & obscurus, eiusque assecle homines barbari, qui literas bonasque artes pestem humani generis existimant, non æquè admittunt: quare & illis meritò euenit, ut dum doctos despiciunt, ipsi ab omni deinde posteritate contemnantur. Plane quanto quis studio doctrinam bonasq; artes amplectitur, tanto sui nominis memoriam celebriorem reddit, ut quia alijs dignitatem tribuit, sibi eam augustiorem venerabilioremq; efficiat. Itaq; M. Pompeius egregium modestiæ encomium retulit, quod non solum ipse bonas literas addiscebat, sed in alijs quoq; doctrinæ cognitionem admirabatur. Is enim, confecto bello Mithridatico, Posidonij tunc sapientiæ professione clari hominis domum dum intraret, fores de more percuti vetuit fascesque lictorios ianuæ submisit, cui se oriens occidentq; submiserat. Præclarum profecto summi viri de literarum dignitate testimonium. Sed tamen hæc ira accipienda sunt, ut tunc togatæ ac militaris rei in vsu politico comparatio prælatioq; fiat, cum vtriusq; utilitas perspicitur ex istimaturq;. Nec enim nuda peritoriq; inclusa scientia virtuti bellicæ vnquam præponi debet. namq;

namq; thesaurus absconditus & res præclara nullius usu infer-
uiens, haud magnè æstimanda est: Sed si vtriq; Reipub. fungan-
tur muneribus, tum demum distinctæ dignitatis iusta ratio ap-
parebit. Quapropter id contendamus, ne studium absque opere
magis vitio quam laudi nobis in difficili vitæ statione versanti-
bus detur.

Vt porro artis cuiusq; perfectio in usu & exercitatione con-
sistit, sic nobilis & magni viri prudentia atque generositas illu-
strior & præclarius efficitur, si eam cum rerum cognitione tam
difficillimis peregrinationibus testatam fecerit. Sic Horatius
magna cum sapientiæ atque virtutis commendatione Vlysses
celebrat, quod multorum prouidus vrbes & mores hominum
vidisset. Istud verò ijs maximè necessarium esse videtur, qui
primam æratem in rerum copia & amicorum rectè sentientium
inopia transegerunt, vt de quibus domi admoneri non potue-
runt, ipsi in exteris locis exemplo studioq; aliorum videant &
experiantur. Peregrinatio enim, vt Democrito placet, vitæ
frugalitatem adfert. Proinde qui varias Rerumpub. formas
perlustrauit, variasq; fortunæ vices sustinuit, & fortior in curis
perferendis, & dexterior in dandis consilijs, vbi Reipub. curam
adeptus fuerit, existit; & simul intelligit, quantum in virtute,
quæ viro sapienti omnem terram esse patriam facit, positum
sit. Huius loci est præclarum Ducis Cephaliorum exemplum
referre. Hic licet naufragio summo cum detrimento eiectus
fuerat nudus & solus, nihilominus tamen homines à suo con-
spectu auertit: siquidem præclarissimo virtutis tegumento or-
natus & indutus fuit. quare tantum sui videndi desiderium ex-
citauit, vt regina & tota simul Phæacum multitudo epulis re-
lictis hunc conspiceret, huic gratulari, huius fortunam vnice à
Deo expetere non dubitarent; exclamat ibi Homeri interpres:
O homines sit vobis cura virtutis, quæ cum naufrago enatat,
& in litore nudum eiectum fortunatis Phæacibus venerabilio-
rem ostendit. Abundè ergo ipsa rei veritas ostendit, quod rei
C 3 propriæ,

propria, firmæ & nullo periculo edomandæ, innitendum sit:
cætera namq; omnia fortunæ magis ludibrio exposita sunt, vt
in talario ludo nunc huc, nunc illuc transeuntia. Ne longiores
simus, rem totam paucis complectemur. Hi ergo, de quibus
modo diximus, nobiles duabus potissimū rationibus præcel-
lunt; virtute nimirum & generositate vero nobilitatis orna-
mento: quandoquidem iuxta Philosophi dictum, nobilis ille di-
citur, qui ex bono nascitur stemmate, generosus quinon degener-
rat à natura sui ipsius. Quocirca interrogati, quid de cuiusque
dignitate sentiamus, responsum Socratis Lectino Gorgiæ da-
tum referamus: *ὅτι οὐδ' αὖτε πῶς ἀρετῆς καὶ πτωχείας ἐστὶν.*

Sed quia diuitiæ magnum nobilitatis atq; magnificentiæ
momentum in se continent, de legitimo earum vsu pauca disse-
remus. Magnam quidem diuitiæ vim habent, hisce præsertim
corruptis deprauatisq; hominum moribus, vt apud omnes fe-
rè ordines Bellerophontis impia vox exaudiatur. *Sine me vocari
pestimum, vt diues vocer.* Subiicit tum postea:

*Nemo an bonus, an diues omnes querimus,
Non quare ex vnde, quid habeas tantum rogant.
Vbiq; tanti quisq; quantum habuit, fuit.*

Ecce quod admiratione fortunæ malum humanis influxit mē-
tibus. Nec enim pecunia solum amatur, sed nemo etiam, nisi
diues sit, honore dignus habetur, prout & illud Horatianum
consonat.

Omnis enim res

*Virtus, fama, decus diuina humanaq; pulchris
Diuitijs parent; quas qui construxerit, ille
Clarus erit, fortis, iustus, sapiens etiam Rex
Et quicquid volet.*

Quinimo eò vsq; hæc hominum opinio progressa est, vt & Pro-
uerbij vicem sustineat: Pecuniæ obediunt omnia. Certè magna
hic mentis discretione, magnaq; opus est fortitudine, vt, quod
rectum est, teneas tantæq; multitudini resistas. Nec etiam Me-
nandri Senarius me later, *πρωτὰ δ' ἀγχιον καὶ τὸν εὐγενὴ ποιεῖ.* Si-
quidem, vt & Aristoteles attestatur, fieri non potest, aut non
facile

facile fit, vt is agat res præclaras, cui facultates defunt: multa
namq; per amicos, per diuitias, per ciuilem potentiam, tanquã
per instrumenta, aguntur; attamen hoc diuitiæ non habent, vt
virtutis sibi propriam gloriam vendicent, quantumuis sint po-
tentissima media adipiscendæ virtutis conseruandæq; dignita-
tis: Vbi enim non honoratur virtus, vix ibi firmus optimorũ
status consistit. Quare non sunt audiendi, qui fauore deprauatę
opinionis calumniosè virtuti, vero nobilitatis fundamento, de-
bitum honorem detrahunt, aliq; rei, natura sua vilissimæ &
caducæ, ascribunt. O cæcæ mentes. O vana consilia homi-
nũ, qui diuitijs confidunt, ne virtuti præmia dentur. Vtinam
aurea Pythagoræ sententia animis quorundã inculcari possit.
Diuitiæ, ait, anchora sunt infirma, gloria etiam infirmior, cor-
pus itidem, magistratus, honores, omnia hæc imbecilla & vi-
ribus destituta. Quæ ergo sunt anchoræ firmæ? Prudentia,
magnanimitas, fortitudo, eas nulla tempestas agitat: Hæc
Dei lex: virtutem solam esse, quæ potens solidaque sit; cætera
omnia nugas & ineptias. Hoc si plerique intelligerent, maio-
rem profectò virorum fortium atque innocentium copiam
haberemus, & omnia tuta salua in rebus humanis forent,
cessaret lucri cupiditas omnium malorum fomentum, vigeret
iustitia, vt quisq; tueretur quod suum est: pax almifica domina-
retur: nã quisq; se suisq; contentus aliena non diriperet. At nunc
tempora malos desidesque proferunt, qui dum nihil animi,
nihilque neruorum habent, alienis incõmodis sua augere com-
moda, alienis meritis suam ornare dignitatem peroptant: imò
momentis omnibus voluptates capere festinant. Hi cum maxi-
mum bonũ iudicent opes, quas si bonis artibus assequi non pos-
sunt, malis assequi volunt, fraudant, rapiunt, spoliant, insidian-
tũ, abiurant: nihil deniq; momenti aut pensi habent, dũ modò
auro coruscent, argento, gemmis, vestibus fulgeant, audivissimo
ventri opes suggerant, stipati familiarũ gregibus per dimotũ po-
pulũ sēper incedant. Sic Lact, sua quõq; tēpora lamentatus est.

Hos

Hos autem vulgus hominum cæcū & demens nobiles existimat, ipsi etiam se tum beatos censent: cum tamen extincta mentis vi atq; vigore ad mortem concitatissimè properent. Lacedæmonijs etiam oraculo responsum est; tum demum Spartam vincendam esse, cum homines aurum & argentum in pretio habere cæperint. Nos igitur melioribus instituti literis saniores amplectamur sententiam, ne pauperi, cui ipsa veritas regnum cælorū adducit, dulci fortuna ebrii insultemus. namq; terrenis confidentes caducisq; rebus, diuina plerumq; negligunt, vt verendum sit, ne eueniat quod Christus ait: difficilius esse diuitē regnum cælorū ingredi, quam Camelum foramen acus transire. Reliquum nunc est, vt Deum Opt. Max. omnis sapientiæ auctorem supplici mente precemur, vt mentes nostras suo illuminet spiritu, nosque veram Pietatis ac Virtutis semitam ingredi doceat: namq; eius auxilio consequi licet, vt ipsum teneamus, virtutem colamus, alios beneficijs, nos virtutibus ornemus. & tandem decurso hoc vitæ miseræ curriculo cælestis dignitatis ^{ἐν εὐφροσύνῃ} adipiscamur. Idem ille pater omnis gratiæ nos in sui tutelā recipiat, vt omnes nostrę actiones & consilia in sui honorē, Reip. emolumentū atq; nostram salutem cedant felicissimè. Dixi.



Biblioteka Jagiellońska



star0025881

